

Confeugo 2016

Sciô Scindico,

comme sciâ peu vedde, a fâ i mogogni son da solo: a frevâ a Maria Vietz a n'â lasciòu. Ma ninte sciato: mi no proviö a fâ rie Vosciâ comm'a gh'a provòu ògni anno a Maria (e 'na vòtta a gh'é scinn-a ariêscîa) anche perché mi no gh'ò a capacità ch'a l'aiva lê de esprimme i sentimenti do cheu co-in gesto, co-in'eugiâ, co-in sorizo a meza bocca. Ma 'na cösa a faiö: diö 'na parte di mogogni in rimma, comm'a fava lê, e se pe caxo ne scapiâ da rie, son seguio che a Maria a ne saiâ contenta.

St'anno chi in pö de personn-e m'an vosciuo sugerî quarche mogogno pe fâ savei a Vosciâ cöse secondo liatre no va ben e cöse o Comun o dovieiva fâ pe rende Zena ciù bella e ciù vivibile. E mi diö solo quello che m'é stæto domandòu de dí.

In primmo inportante capitolo, che za atre vòtte ò tocòu e che dunque no l'â ancon avuo soluçion, o l'é quello da poliscia da çitæ. L'igene, 'na vòtta tanto decantâ, dov'a l'é anæta a finî? Purtròppo Zena a l'é sucida e dizordinâ. Pe-e stradde s'atreuva fregogge de tutto; da-a vixin a-i cascionetti da rumenta no se ghe peu pasâ perché l'é ciù quella de feua che quella de drento. Saiâ miga che chi va a ravatâghe drento o a caccia de feua? Perché no se riesce a avei 'na çitæ polita e ordinâ?

'N'atra segnalaçion a rigoarda o verde publico ch'o no l'é curòu comme se doviæ. E comme scinbolo m'an sugerio l'erbo ('n erxo) ch'o l'é a meitæ de stradda Cantore a San Pê d'Enn-a: o l'ea bello e pin de feugge ma òua, no se sa ben o perché, o l'é lasciòu moî e ciù d'un o l'aspeta de vedilo crovâ da 'n momento a l'atro.

Ò anche avuo quarche segnalaçion ciù generale pe-o sviluppo e o rilancio de Zena. M'an dito de domandâ a Vosciâ cöse sucediâ a-a Fea do Mâ e a-o Salon Naotico, inportante vedrinn-a da çitæ; cöse ne saiâ do Carlo Felice: o continuoiâ a ese 'n'ecelensa de Zena ò o seu destin o l'é 'n atro? E cöse se fa pe dâ a-i çitadin, quande son in gio pe Zena, quello senso de seguessa e de traquilità?

Concluddo co-a Valadda do Ponçeiva dove inti spaççi ex industriali nasce de longo di centri comerciali che fan scentâ o comercio a-o menuo e compromettan a vivibilitæ do quartê.

E òua e rimme.

Òua mi preuvo, e con ansietà,
a fâ da mi a parte da Maria
ch'a l'ea, da senpre, "A voxe da çitæ"
mogogni fæti con a seu ironia.

Aloa. Primmo problema. Inta Ponçeivia,
con tanta gente, manco gh'é 'n uspiâ!
'Na vegetta, meschinn-a, a me dixeiva:
«Pâ quæxi 'n lusso de sentise mâ!»

No gh'é i dinæ, sciâ a dixe? Aloa se taggia
pe drito 'na colinn-a, inta mainea

de fâ 'n deruo. E a-a primma avisaggia
de moutie da uspiâ ... *Rupe Tarpea!*

O no ghe pâ 'n conseggio tanto bon?
Ma no se spende ninte! Pe 'n uspiâ
son milioni. Coscì, basta 'n sponcion...
E a çitæ a peu solo risparmiâ!

Pöi, 'n'atra cosa. E stradde gh'an pertuxi
e fòsci a ciù no dî. Dase da fâ
öcore pe evitali, dixe e vöxi!
Tröppe palanche? No, basta arolâ

i padroin co-i seu chen. E ghe n'é tanti!
E megio ancon se son de quelli gròsci:
senza sacco e paletta, inderê e avanti....
sciâ a vediâ comme t'inpan tutti i fòsci!

I padroin dovian dighe: «Stanni atento
e, pe sta vòtta, amia dove ti a fæ.
No a caxo comme senpre: fanni centro!
Tò-u domando pò-u ben da tò citæ»

Però da bon zeneize me domando
se no saieiva o caxo controlâ
a qualitæ di loéi condiçionando
a-e verifiche i conti da pagâ.

No gh'ò atri conseggi, me despiaxe.
Cöse sciâ veu, ò tutto improvisòu:
a voxe da Maria purtròppo a taxe
e o mæ salûo solo o l'é restòu.

Primma de finî i mæ mogogni m'é cao dî 'n'atra cösa. No l'é goæi che o Conseggio regionale
do Veneto o l'à aprovòu 'na lezze dove se dixe che o pòpolo veneto o l'é 'na minoransa
naçionale, arvindo coscì a stradda a-o bilingoismo, a l'insegnamento do veneto inte scheue
e a l'uzo do veneto inti ofiççi publici e inta toponomàstega.
A domanda che fasso a tutti niatri liguri e in particolare a-a Region a l'é: perché no se peu
fa a mæxima cösa anche chi in Liguria?

Tanti ouguri a Voscià e a tutti.
Pe Zena e pe San Zorzo!

Franco Bampi
Presidente de A Compagna